

張文襄公電奏

張文襄公全集卷八十五

電奏十三

致軍機處外務部江甯劉制台上海呂大臣盛大

臣光緒二十八年八月初六日巳刻發

樞東電悉俄使所言約內只許口岸製造乃日本約所  
許此次並無許內地製造之事出厥稅力爭始允抽十  
似不爲輕口岸設洋廠利歸洋東者二利歸土貨華工  
者八較之洋貨全自外來尙可稍塞漏卮洋員監察常  
關鹽土稅議定由督撫選派不過杜絕苛擾重征百貨  
諸弊以釋英商之疑洋員僅止查弊抽收增減之權仍

在華官所言似均無足慮惟用洋員慮失自主權一節若專指監察之洋員則未確若統論各海關稅司則不爲無見俄人既言及此我正可藉此與赫德商卽以俄人挑剔爲詞蓋海關稅司及幫辦各國人皆用獨不用中國人華人只充書手及賤役耳總稅司此舉太不公平自當訂明兼用中國人應令總稅司選中國上等人至海關學習數年卽可勝任以便將來參用若我國勢漸強則海關洋人可漸減蓋俄最忌英此乃絕好機會趁俄人此次挑駁望卽速與赫商漸漸收回關稅自主之權實有大益事雖不能驟辦必須趁此安根東三省

郵政俄不應阻我用外國人江督劉所言真灼見俄人肺腑管見則謂亦宜趁此與赫德議定東三省及各省皆中國外國人兼用惟內地各省或暫由稅司試辦將來仍歸中國官辦則郵權不致旁落而俄人亦無詞矣去年遼約藉英以阻俄此次海關郵政正可藉俄以馭赫鵠蚌相持中國之利機不可失遵旨通籌覆陳請代奏麻

軍機處來電

并致劉制台一日亥刻到

光緒二十八年八月初

俄使昨至外務部言與英所定商約常關鹽土等稅皆歸海關洋員監察及內地製造均失中國自主權

利出厥稅亦太輕殊不合算又言東三省郵政祇當  
中國人自辦不能派各國人等語奉旨知照務卽通  
籌妥酌作速分別商辦勿致藉生枝節爲要樞東

致軍機處

光緒二十八年九月初八日酉刻發

奉旨署理江督蒙恩感悚本應趕速赴江惟鄂省經手  
要件太多必須略爲清理洞近來多病今年尤甚以時  
局多艱事機緊急不敢請假遇公事稍繁輒發頭暈舌  
燥股足軟弱夜不能寐諸證僚屬共見故諸事只能量  
力趕辦大約必須十數日方能啟程本月下旬必到江  
甯萬不敢稍事耽延現已電致江甯藩司揚州運司上

海道洋務局及各統領如目前有十分緊要重大事件隨時電知即可電復商辦不至貽誤除啟程日再行電奏外請代奏庚

軍機處來電

光緒二十八年九月初六日亥刻到

光緒二十八年九月初六日內閣奉 上諭兩江總督著張之洞署理迅速赴任湖廣總督著端方暫行兼署欽此奉到電旨即欽遵辦理樞魚

致軍機處外務部

光緒二十八年九月二十三日亥刻發

頃接滬電盛大臣現丁父憂無論如何想百日內斷不能出而治事美日商約正在相持喫緊之際呂大臣一

人恐難獨肩其責查使美伍大臣熟諳外國律法深通交涉與美廷相交甚洽若令任議約之事必能得力擬請鈞處裁酌代奏可否請旨電飭伍大臣刻日束裝回國畀以議約之任實於商約有益計由美取道東洋至滬不過一月之程美館現無要事使務暫令參贊代辦可無貽誤再商約重要細密全賴集思廣益協力堅持前議英約多賴前江督劉同心匡持之力此時美日兩國之約日本要素更多美所索亦有難行者至加稅一節則美日均不願照英約所加之數持之甚堅辯駁非易洞才短多病精神思慮不能周到美國商務尤重北

洋擬請添派北洋袁大臣會議各國商約諸事得以共  
相討論商酌辨駁袁大臣辦事素有識力深諳交涉操  
縱多一人籌畫或可多保一分權利必於大局有裨洞  
爲商約緊要急須得人起見旬日以來籌計焦思不敢  
不敬陳管見以備朝廷采擇是否有當不勝惶悚之至  
請代奏濛

致軍機處外務部

光緒二十八年九月二十九日  
午刻發

奉旨派候補四品京堂伍廷芳會議商約事宜深幸得  
人可以共資商酌惟美日開議已久尙無眉目擬請旨  
電飭該大臣迅速回華美館使務暫交參贊代辦無庸



引之書名集 卷八 十三  
候梁誠到洋接替以期伍廷芳早日到滬開議免致外人催促請代奏世凱之洞同叩豔再此電係袁大臣自正定來電商明會奏並陳

致外務部

光緒二十八年十月十一日子刻發

初十日 皇太后萬壽洞偕同城文武在水師學堂設筵慶賀各國領事兵船官主教習等四十餘人咸來慶祝如禮皆以永敦睦誼爲喜賓主歡洽聞各領事皆將電告其政府謹電聞請代奏真

致軍機處外務部

光緒二十八年十一月十三日辰刻發

英泰晤士報館來告曰聞現在東三省邊界設立稅關

係歸前在旅順管理財政之俄人名博羅達夫者辦理現已由其招募俄人多名不歸總稅務司節制所收稅項除清費用外交還中國如此辦法一經中國照允則德於膠州法於越南邊界英於緬甸邊界香港等處定必援請照辦或各國竟於北京各舉總稅司一人共管中國關稅等語查英人所重者其意蓋不願分赫德之權而我中國則以自守主權爲主既名中國稅關則事權應由我自操無論歸赫德與否若事事由我自主則他人自無可藉口其關稅出入各關經費必須由我稽查酌定不能由俄人作主支除交還稅司等員應由中

國自派或由俄人薦舉者亦應多舉數人由我選定如有不妥我隨時有辭退之權必須議明參用中國人並須兼用各國之人藉以牽制俄權上也不然必須中俄並用斷不能專用俄人次也萬不得已或暫由俄人代辦亦必須訂定歸還中國自辦年限以速爲佳免致永爲所踞又其次也前議英約時俄使曾向鈞處言常關鹽土等稅歸海關洋員監察失中國自主之權今東三省稅關竟專歸俄人辦理我不能過問豈不更傷主權乎似可卽以此語反詰之彼將何說赫德把持中國海關久爲各國猜忌輒欲公共管理奈無隙可乘此時稍

不檢點略失主權不惟東三省利權盡歸俄人且恐他國藉口各省關皆將效尤至赫德所攬之權更無收回之望竊謂急宜趁此機會一面與俄人妥定章程以爲日後陸續收回赫德利權之根一面卽豫籌漸收赫權之法此事所關至鉅有聞不敢不陳伏祈聖明裁斷力保主權東三省幸甚天下關稅全局幸甚請代奏元

致軍機處

光緒二十九年正月初九日巳刻發

淮鹽釐課每年六百餘萬新案賠款及舊案洋債京甘各要餉大宗皆取給於此近數年來委辦淮南北鹽局各員大率皆營私害公賢者十不獲一私囊日飽銷數

日虧私梟日熾商人日困淮綱大局殆將不支自運司程儀洛到任後廉介率屬精心實力事事整頓不避嫌怨各員稍有忌憚現正籌辦大舉緝私除弊恤商諸事年前已具奏數日內當可上達其餘各事正在陸續籌辦該運司操守才能實爲數十年運司之冠其才具可及其破除情面今日司道中斷斷無人能及頃該運司已升廣東臬司恐該運司兩年心血盡付東流實爲可惜伏念淮綱盈絀關係極鉅江南籌款大宗惟恃鹽務鹽務理則歲增數十萬並不爲難鹽務壞則歲減數十萬耗於不覺江南賠款用款立即束手至其盈絀之故

實由辦鹽務者之賢否爲之合無仰懇天恩俯念淮綱  
緊要准將運司程儀洛暫行留署運司一年再赴升任  
實於江南財政大有裨益洞深知淮綱日見頽敝江南  
財用難支不敢緘默不言是否有當仰候聖裁不勝惶  
悚待命之至請代奏佳

致軍機處

光緒二十九年正月二十一日亥刻發

頃奉閱電傳邸鈔奉 上諭岑春煊奏川省商務鑛務  
請派大員督辦一摺四川商鑛各務關係重要仍著責  
成岑春煊督辦江蘇候補道鄭孝胥著發往四川隨同  
辦理欽此查道員鄭孝胥平日究心武備素以練兵爲

急故於新式槍礮製造之法有志講求從前隨使日本  
三年有餘親歷其礮兵工廠考究製造理法致力甚勤  
上年臘月因辦理上海製造局道員毛慶蕃經北洋袁  
大臣奏調赴津委辦銀行事務當經遴委該道鄭孝胥  
馳往上海接辦製造局務責成其裁節冗費整頓廠務  
於十二月十三日奏明在案現正籌議節省巨款另購  
新機由江省以次批及外省令各營軍械皆歸畫一籌  
議已有規模日內卽當具奏誠令久於其事成效必有  
可觀若鑛務本非該道所長用違其才難期有濟况當  
今急務莫要於行軍利器而上海製造局爲天下第一

重要關大之局若辦理不得其人徒致百餘萬巨款半屬虛糜製械草率臨用誤事目前江省道員中如鄭孝胥之守潔才長能勝此局之任者實難其選合無仰懇天恩免其發往四川仍准留辦上海製造局實於軍實有裨不勝急切待命之至請代奏箇

致軍機處外務部天津袁宮保

光緒二十九年正月二十五日子刻發

准外務部號電修濬黃浦江奏請由南洋派員奉旨依議本應遵辦惟此事爲害中國太鉅萬不敢輕率派員不得不爲朝廷瀝陳之按公約附件中國國家出費一半與各國干涉者出費一半所謂與各國干涉者指各



國租界產業江口一帶田地產業以及進出江口洋式船隻而言其中業主船主華民居多是中國官民共出費十之七八各國祇出十之二三而該局人員中國祇有三員英國人須有八員其權實爲外國所操查上海舊日各租界名爲中國境內實已與各國土地無異今照公約所有自製造局起至揚子江中以及各河道港口往上一二邁勒之遠又歸該局管轄徵收課稅是自吳淞口起又深入五十餘里至製造局下界之灤華港止無論水陸全行劃歸各國管轄將來官民船隻往來行止停泊皆聽命於洋人卽兵輪赴製造局裝運兵械皆

受挾制稍有波瀾立即禁阻是一舉而將此等大局衝  
要水陸守險治理之權全行屬之外人爲害何堪設想  
查北方拳匪滋擾各國商務受虧然天津開濬北河所  
有河道仍歸中國管轄條約並未奪我主權請查詢北  
洋大臣自悉而東南極力保護商務各國洋商安堵如  
常乃修濬浦江反欲攘奪主權於情理尤不平允查各  
國求修濬浦江無非爲便益商務起見乃乘我急迫不  
暇計較之際朦混入約議約之時前督劉會峴切電達  
全權大臣李據理力爭全權大臣李即據以照會各使  
而各使照覆亦曾應允不侵我主權有案可查比及約

成則吳淞江內外主權全失故前督劉堅持不肯派員  
專作推宕之計希冀逾三年之期則可照約改議章程  
推宕雖非長策然亦是萬不得已之舉不過藉以寬展  
日期可容我徐籌設法一面暗求援助以圖機會今若  
徇各使所請一經派員公約附件便成鐵案隻字不能  
更改委員無從與商所商者不過微末小節主權大事  
全不能議及挽回矣此事關繫國家土地朝廷主權長  
江咽喉豈敢坐視付與外人去冬英薩使來甯洞與談  
及將來管轄諸事其語意甚奢不肯稍讓委員更何能  
爲洞實不敢輕率派員致貽巨患且實亦無委員可派

查此約以三年爲期三年後即可商酌改章前督劉廷  
岩一年有餘實非無故聞上海法總領事頗不以此約  
爲然允暗中請其公使設法助我德領事亦允決不助  
英催我去冬今正上海道袁樹勳三次來省專爲籌商  
此事反覆籌思並密訪之外國人惟有自認全費一策  
或尙可希冀挽救現查若照原約中國國家出費一半  
每年須費廿三萬又華民業主船主出費二三成計亦  
十萬上下中國已出三十三萬孰若多出二三成每年  
自籌全費無庸各國設局代謀使彼不能藉口干預或  
可保我主權若一經派員各國設局卽無挽救之策擬

請旨敕下外務部先行密商法國次密商德國法德若肯助我再切商各國告以中國情願每年獨認全費務以籌足爲度由我自行設局管理所有海口河道港汊應設理船廳與水巡暨燈塔浮標統歸中國辦理至其如何修濬方於商務有益以及一切工程各國儘可派員與我妥商隨時查驗工程但不得稍侵中國自主以及管轄地方之權將來如此江不能開通商船如有不便惟中國是問總之各國之設局者爲濬江以便商也爲籌費以濬江也中國既認出全費誌濬此江則各國自無庸設局此乃事理之當然並非違約揆之公理公

法我理甚長况各使前既應允不侵我主權我今日自宜執彼已允之語與之堅持且各國商人免籌經費於彼亦屬有益或可允從抑或別有保權良法推宕機宜務祈外務部切商各國公使並電我各國駐使徑與各國外部理論冀可挽回並請敕下北洋大臣袁會同籌議阻止防患良策以期集思廣益共保主權不勝憂焦迫切待命之至謹密切瀝陳請代奏有

軍機處來電

光緒二十九年正月二十九日寅刻到

電旨張之洞電奏悉修濬黃浦江一節認籌全費自行設局辦理所陳不爲無見著外務部切實妥商並

會同袁世凱張之洞籌議具奏欽此儉

致軍機處

光緒二十九年二月十二日子刻發

前電奏請留道員鄭孝胥仍辦上海製造局奉旨四川商務鑛務緊要道員鄭孝胥著仍遵前旨發往該省隨同辦理上海製造局亦關緊要著張之洞遴派妥員認真經理欽此自應欽遵遴員接辦查該局乃東南武備根本誠如聖諭亦關緊要且每年開支甚鉅人皆視爲利藪紛紛營謀非廉幹任怨之員斷難勝任江蘇道員中除現有要差外實難其選前經電奏陳明在案查有湖北候補道趙濱彥操守清廉風骨剛鯁辦事認真不

避嫌怨以之接辦上海製造局務必能考工節費裨益  
軍儲相應請旨電飭兼署湖廣督臣端方迅飭該員刻  
日來甯以便派赴上海接辦局務神鄭孝胥早日交卸  
赴川以副宸厯請代奏文

外務部來電

光緒二十九年二月十四日到

文電已進呈奉旨著照所請欽此外務部寒

致軍機處

光緒二十年二月十五日戌刻發

十三抵鄂十四接篆請代奏咸

致軍機處

光緒二十年三月十二日亥刻發

江南製造局移建槍礮新廠一事之洞陛辭時面奉懿



引之奏之真  
名  
旨飭赴江南查考會商妥辦回任後諸務紛雜不得不  
略爲部署茲定十三日乘輪前往江南先至蕪湖勘視  
灣沚地方形勢再赴江甯與兩江督臣妥商辦法請代  
奏文

致軍機處

光緒三十年四月二十三日亥刻發

洞於二十三日回鄂除奏報外請代奏據

致軍機處

光緒三十年六月十五日午刻發

前奉感電旨湖北新軍尙稱精練能否調赴廣西合力  
援剿著張之洞卽行電奏等因欽此當因湖北新軍武  
建八營前已調赴廣西駐紮龍州辦理邊防常備左翼

八營續又奉調赴北駐紮通州協防畿輔現在省城兵力無多添募之營尙須訓練不得不抽調省外防軍以資派遣正在籌辦調撥間續奉江電旨著卽毋庸前往等因欽此並接桂撫柯電謂三陞收復人心稍定鄂軍毋須再撥以免勞費等語自應欽遵諭旨鄂軍毋庸前往惟近接湖南護撫張電知桂林匪警又逼湘邊異常喫緊黃忠浩一軍由湘西赴桂取道不免紆曲其由全州至永州大道乃當年髮逆由桂出湘熟路最關重要湖南僅有張嘉鈺一軍駐紮黃沙河一帶兵力旣單其軍亦不足以當強敵江蘇道員杜俞一軍到防未知何

時永州防務較靖州尤爲喫緊私衷萬分懸系必須有宿將重兵出境力遏其衝方爲正辦查提督劉光才膽識過人戎行老練之洞所深知近日廣西匪情尤爲熟悉前聞已由廣西回寶慶原籍經晉撫奏署大同鎮奉旨令來京陛見該提督現尙在湘其部下驍弁精卒亦尙未散擬令就地迅速招募精壯八營一切照湖北軍營規制選派得力營哨官弁管帶操練歸劉光才統領成軍後刻日馳赴湖南道州邊境以外在廣西全州一帶扼要防截相機迎剿總之桂林省城以北爲止所有餉項軍械均由鄂省籌撥俟半年以後察看湘省沿邊

及桂林以北匪情或留或撤再行酌量奏明辦理除電  
湖南護撫張錄電飛咨劉光才迅速查照辦理外合無  
仰懇天恩俯念湖南邊防緊要准令劉光才暫緩赴京  
陛見留於湖南由鄂派委統領新軍前往全州一帶駐  
紮防剿桂匪以固湘邊湖南大局幸甚再此事因與湘  
省往復詢商是以覆奏稍遲合併陳明請代奏咸

致外務部

光緒三十年六月十八日午刻發

篠電悉施南教案據該府縣查明電稟係因天主教會  
主教德希聖率帶多人前往沙子地游覽路經花背有  
福音教民向元新欲看德主教被德主教隨行教友買

澄清喝攔掌嘴彼此爭吵經向光錫向德主教求情德  
主教令向姓於初六日在沙子地教友李家炳家備酒  
八桌放鞭六萬服禮寢事初七日德主教等將要起身  
觀看人衆賈澄清稱前所放鞭尙未足數勒令向姓將  
鞭補足沿途燃放以致激成衆怒紛紛喧嚷匪徒乘間  
將德主教德神甫董神甫三人殺斃並斃華教友四人  
燒毀李家炳蔡賢欽陳漢科之屋隨卽解散並無另有  
一洋教士被捉亦無鬧教堂之事已將德主教等屍骸  
妥爲棺殮派人看守一面速拏首要各犯訊明懲辦等  
語迭經飛電嚴催該地方文武懸賞勒限捕犯嚴辦並

飭宜昌鎮陸續添撥勇隊二百餘名又由省城特派常  
備軍一營先後馳往彈壓保護協緝要犯前派查辦道  
員左元麟已抵宜昌現借法領事所派荷國田教士同  
往確查詳報妥議辦法昨又據施南府縣電稟已獲犯  
二三名研訊尙無端倪等語該地方文武疏於防範首  
要各犯尙無弋獲應請旨先將代理施南府知府湖北  
候補同知何錫章署施南協副將吳友貴摘去頂戴本  
任恩施縣知縣王鴻賓暫行革職留緝勒催拏犯俟獲  
犯再行開復再被殺三教士均係比國人並聞除俟獲  
到正犯再行電聞外請代奏示復嘯

致軍機處

光緒二十年七月十二日亥刻發

之洞前奏請留提督劉光才統領湖北新軍八營前赴  
全州扼防湘南大路奉旨允准續經元鼎以湘西喫緊  
奏請截留劉光才所部馳赴寶慶靖州一帶防守西路  
奉旨令與之洞會商辦理遵經往復電商當因桂匪悍  
股屯踞老堡口近又分竄梅寨古宜岌岌可危並聞有  
零匪竄入貴州永從縣之大年河該處與靖州接壤論  
現在情形湘西防務實較湘南爲重已定議飭劉光才  
親率所部兩整營馳赴寶靖一帶擇要扼紮以重西防  
惟兵力尙單已照湘省營制由湘添募四旗撥交劉光

才統轄此後劉光才一軍卽歸湘省調遣如湘南大路有警鄂省擬卽由所練常備軍內抽調數營派令原帶之員統率前往仍照原議出湘境赴全州一帶相機防剿以顧南路現已密爲部署聞警卽行俟開拔時再行奏報似此西南兩路分籌防剿較爲周密所有劉光才一軍遵旨會商辦理情形請代奏之洞元鼎同肅文

致外務部

光緒三十年八月二十五日子刻發

施南教案疊飭荆宜施道余肇康湖北試用道左元麟在宜昌與法參贊買紗納切實磋商茲已定議第一款懲辦兇犯已將獲案訊實起意下手之正兇向燮堂向



元新向爵臣黃平山崔光熙黃玉階黃觀連黎登甲八  
犯在施南正法梟示黃成宜黃鏡亭二犯解赴宜昌正  
法梟示已死之崔春生一犯亦已戮屍梟示此外已獲  
未獲各犯如訊有實係在場下手殺害主教等之犯仍  
應按律懲辦第二款優予撫卹計一主教兩司鐸被害  
共賠銀十萬兩造主教司鐸墓廬及撫卹被搶被燒之  
各教民房產等項給銀二萬兩另幫助建造醫院善舉  
銀二萬五千兩通共十四萬五千兩分五期交付至明  
年臘月付清第三款酌給基地計在荊州城內代覓寬  
長各二十丈之地基一塊爲建造醫院之用在施南城

內代覓寬長各十丈之地基一塊爲建造教堂之用地  
價及工程用費均在前項賠卹款內動支官不另給惟  
所建荊州醫院及施南李子槽兩處教堂均須奏明給  
予敕建字樣并飭地方文武妥爲照料第四款各官處  
分議定本任恩施縣知縣王鴻賓卽行革職代理施南  
府知府何錫章摘去頂戴三箇月現署恩施縣知縣王  
祐記大過四次俟補官日罰俸三年署巴東縣知縣田  
芸生記大過三次俟補官日罰俸二年署施南協副將  
吳友貴獲犯甚多請開復摘頂處分第五款係稱謝湖  
北辦犯迅速之意此外別無枝節業於二十一日彼此

畫押此案各教士極力鼓煽挑剔謂主教品級甚尊所欲甚奢意欲大興波瀾勢甚洶洶幸法參贊明白近情尙受商量法公使不爲教士所搖動得以和平速結稍堪仰慰宸厯除專案具奏外謹先電陳請代奏有

致外務部

光緒三十年十月十一日亥刻發

初十日恭逢 皇太后七旬萬壽各國領事偕水師將校隨員遊歷人員並稅務司鐵路員董工師文武各教習洋員等均來慶賀設讌相待歡欣頌禱出於至誠總領事等囑之洞代爲電奏恭祝 皇太后萬壽無疆強泰安樂謹據情上聞請代奏真

致軍機處陸軍部

光緒三十年十二月二十二日  
未刻發

湘省前奉電旨杜俞一軍著卽撤回江南分起妥爲遣散等因欽此其時方在兩江署任一再與署湘撫陸往復電商以湘防正在喫緊深慮撤遣或有他虞並因該軍本係湘人擬責成杜俞在湘汰三留七帶回江南分別留遣奏蒙俞允在案嗣之洞准粵督岑桂林來電以兩江故署督李訪聞杜俞一軍聲名太壞屬舉員接統事關大局不敢不告等語洞乃電詢湘省始知此事原委維時適值滇軍遣勇在黔邊叛變長江一帶華興會革命票匪正在武漢地方勾結亂黨消息甚緊當以杜

軍本張春發舊部素無紀律設聞遣撤之信中途譁潰  
另生事端斷非杜俞所能約東岳州漢口皆通商口岸  
華洋雜處稍有騷擾立構衅端巨患不可不防與其撤  
軍不如易將電商甯桂湘三省擬令劉光才前往接統  
仍令杜俞爲幫統嚴申軍律力加整頓去其敗羣者百  
數十人全軍便可改觀俟桂事大定再定留遣旋接粵  
督岑桂撫李覆電深以此策爲然時馥適到兩江署任  
會同方詳加斟酌電鄂云撤勇比招勇難杜道平時旣  
不能約束臨撤必難鎮壓且永州非撤勇之地儻有變  
故非附桂匪卽成湘寇此時只有換將整理之一法亦

與之洞意見相同因卽電致湘撫陸函詢劉光才令其酌量情形能否前往接統迅速具覆湘西電報不通近始據劉光才覆稱張慶雲近在黃沙河似可飭令接統若必須渠來則當帶原來之忠毅三營同往等語是劉意必移軍駐永方能接統杜軍以資控制然湘西又須另派他軍填紮則添營增餉湘力亦屬爲難自不如仍令劉軍留防西路旣免跋涉亦較熟悉情形查提督張慶雲本湘中宿將歷練甚深所部之在黃沙河永州一帶者尙有六旗黃沙河距永州僅九十里飭令就近兼統杜軍足資鈐束於事亦便此次方奉調撫湘道出武

昌與之洞面商定議復電商馥所見亦同體察情形儻令張慶雲接統該軍仍以杜俞爲幫統約束整頓必能悉臻妥協所有該軍餉械仍由江南照案撥解謹合詞縷晰具陳請代奏周馥張之洞端方同肅養

致軍機處

光緒三十一年三月二十五日發

恭讀敬電諭旨以微臣染疴仰勞聖懷屢系天語垂詢惶悚感激莫可名言之洞所患係口瘡將及一年中醫云係心勞肝火病在內東醫云係胃熱牙蟲病在外竊自揣察中醫東醫之言均有所見大率數日內公事順暢睡時較多則痛止公事拂逆睡時過少則痛劇七月

以來延東醫診視並於飲食起居留意消息內外兼治已愈六七分謹當遵旨善爲調攝早日就痊以慰宸厯謹由電復陳叩謝天恩請代奏有

軍機處來電

光緒三十一年三月二十四日戌刻到

電旨聞張之洞現在患病該督係屬重臣著卽妥爲調攝並將患病情形據實電奏以慰廑系欽此樞敬

致軍機處

光緒三十一年六月二十二日戌刻發

兩奉電旨因日俄直接議和令將現在因應及將來善後通籌電奏以備采擇曷勝欽悚查日俄議和俄必願我與聞日則斷斷不容我與聞俄願中國與聞者欲借



中國地主爲題從中攔阻一二免使日本將東三省權力多占則俄以後尙可乘機窺伺也日本不願中國與聞者我若與議則彼所欲得者我使臣必矜慎願惜多煩辯論彼所讓還者中國視爲力爭收回不見彼之人情且恐中國與聞西國亦必干預則日本所得利益無幾矣且日本君民上下之意皆須俟攻克哈爾濱海參崴以後方能制俄之要害勒索極鉅兵費盡奪俄人遠東權力此乃一定宗旨總之視其兵威之所極以爲和約之範圍然則日之要素於俄究竟能至如何分際此時日人亦不能豫定不肯自限現在庫頁島已爲日得

海參崴後路已有日兵登岸俄之內亂日熾其東方人心兵力益不能支日之待俄不能定則其待我亦不能定故此時卽中國有員與議亦無益況彼不允乎各報言外務部照會日俄謂關涉中國之事若中國不與聞者中國將來斷不承認聞日本復文不肯許可要之此照會乃應有之義自不可少無論彼認與否將來可執此照會爲爭論之根據然只此已足強聒無益惟有俟其與俄定議後我方能與之開議大抵抱定日本宣布許我之完全主權爲定盤鍼以東三省鐵路中國亦須酌分權利爲實際以俄人震驚陵寢荼毒人民與日兵

近年來情形爲比較以結近援禦遠患爲歸宿所有節目只可臨機操縱似難豫擬此因應之大要也至於善後之法約有五條一曰徧地開放查從前俄據東三省時日本人卽力勸我以徧地開放爲抵制俄人之策今日俄去日來在我仍無以易此蓋非此無以慰各國均霑之望亦無以杜強鄰吞併之謀惟徧地開放辦法其中條目差別不同應請飭令此次遊歷大臣至外國詳細考查期於中國情形行之無弊二曰變法此後東三省官制政法必須掃除舊習因時制宜方能保安且各國雜居非采用西法參用外國顧問官斷難控馭顧問

官可東西洋人參用而日本人無妨稍多三日中日兵合力駐守聞日本人言該國之意擬留兵二十萬人駐守亦知需餉過鉅中國難籌當於東三省就地籌餉查日俄定約後若無日兵斷難杜俄之侵軼日本固斷不放心我尤不能安枕且日索取俄之賠款亦必留兵或婉商日本彼暫駐兵十萬分數年次遞減撤我卽在東省速練新兵用日本將弁教練統帶分年遞增至十萬總以華兵添足日兵撤盡爲度此項華日兩軍之餉應由東省就地自籌但將來無論華兵如何精強於哈爾濱及邊界尼布楚兩處日本斷不能全不駐兵若能主

多客少亦尙無害四曰就地籌餉東三省地廣土饒鐵  
林魚鹽穀酒之類大利甚多據日本人言若經理得法  
十年後可歲得三千餘萬縱不能及此數得半亦佳光  
緒二十七年八月洞會同江督劉奏請開放東三省摺  
內已詳照錄日本公使近衛篤磨來書所籌具有條理  
至荒地招墾一節原函拍賣之名不甚妥而招租則無  
妨年限不宜過遠各國不宜偏重若用日人爲理財顧  
問官似乎千萬可籌此外臺壘設備民事學堂一切事  
宜需款尙多惟有先借外款開辦陸續籌還五曰以後  
防俄之策日本緊要主意必欲將俄兵全數驅出東三

省界外方能議和俄不甘心必致由恰克圖庫倫窺伺張家口以抵補其東隅之失此事中國固須嚴兵以待然斷非中國獨力所能抵禦惟有俟日俄定約後與日本熟商辦法彼慮俄由庫倫北來橫穿蒙境遼西截其後路必助我設法防備總之此次日本若於東三省不占最優權利慨然送還中國斷無此事然所得過奢則既食前言又招歐忌彼亦不爲日本爲中國正所以自爲然欲強日本則不能不存中國俄專欲愚中國吞中國純乎損我益彼日本既擅北海之權則不惟阻俄人之橫行並可抑膠澳之恣肆故無論如何定議日本在

東方得何權利皆勝於俄人遠甚日俄待中國之情勢孰暴孰和兩國之強弱於中國孰利孰害互較自明權衡既審因應自易但日俄和議之成尙早總在三箇月以後此時應請電旨密飭東三省將軍都統文武各官體察目前情形各抒己見以備參酌以上因應一條善後五條日俄比較一條皆專爲東事計至於修明內政力變舊習以免外人乘機要挾效尤染指此乃治本定法自強通義累牘難盡謹專就東事密抒其管見備采上年九月十六日洞遵旨密籌東三省事宜一摺大意略同再此事因體察日本近日情狀是以覆奏稍遲合

併聲明請代密奏養

致軍機處外務部

光緒三十一年七月十二日亥刻發

奉齊電旨敬悉查粵漢鐵路議與合興廢約一事疊奉寄諭責成之洞妥籌辦理以挽利權遵經電商盛宣懷會電駐美使臣梁誠照會美外部聲明合興違背合同三省紳民萬口一詞力持廢約朝廷俯順輿情不能強數千萬人遷就壞局自蹙生路等語美外部自接此照會口氣始鬆嗣因盛宣懷與湘紳意見不洽旋復患病之洞屢次去電皆不能復三省紳民及在東西洋各國之中國留學生紛紛電致之洞情詞迫切萬口沸騰力



請之洞爲三省紳民代表獨力擔承之洞不得不慨然  
肩任許三省以必能收回始稍帖然乃徑電梁使切商  
辦法自之洞與梁使直接商辦不攙雜他人以後宗旨  
始歸畫一惟合興股東要挾刁難屢議屢悔相持半載  
有餘之洞堅持定見相機操縱費盡苦心始克磋商就  
範五月初經梁使聘用之美前外部大臣福士達與合  
興聘用之美前兵部大臣路提美前按察使英格瀾等  
商定節略文曰茲因中國政府將建築鐵路之特權及  
合同注銷作廢又不准合興續辦路工惟情願給以公  
道償費此項償費訂定總數計美金六百七十五萬元

中國政府可將合興在中國所有產業已成鐵路鐵路材料測量圖表開鑛特權以及在中國所有權利無論明指暗包一概全行收管所有合興已提之中國政府借票除已售之二百二十二萬二千元外一概交還中國政府查收至此項已售之二百二十二萬二千元或交還或收存仍聽買主自便如買主願意收存或全數或少數每百元應按九十元計由總數六百七十五萬元之內扣抵惟不論如何辦法此項二百二十二萬二千元借票在西一千九百五年五月一號並付息銀五萬五千五百五十元中國政府須至本日起於三箇月

內照數付給又總共六百七十五萬元內中國政府須至本日起於三箇月先交二百萬元所餘之數須自本日起限六箇月內一律清付合興照收所有交款訂明由中國政府妥速籌辦中國政府所交之款須至一千九百五年五月一號起至交款日止按年息五元計加付利息以上辦法應由中國政府及合興股東批准方作定議一千九百五年六月一號福士達路提英格蘭簽押此粵漢鐵路爭回自辦之實在情形也彼時因此約尙是草議須得比股東約期會議後方能作准又須將鄂湘粵三省應攤此項償費妥商籌備始有把握是

以未敢輕率瀆陳現在此項贖路之款三省紳民以急切難得現款必須先借外債再行陸續籌還又以償費數鉅攤認不無爲難堅屬之洞統籌合借再爲酌數分派當向英國商妥暫借英金一百十萬鎊約合華銀八百萬兩以十年清還年息四釐半不折不扣並不須以鐵路作抵已由英領事將草合同送來准可作數正在電致梁使轉催合興股東從速定議茲接梁使電稱合興股東摩根受比王峻使意圖翻悔美總統亦接到駐京美使柔克義電稱中國政府無意廢約且甚願美國接辦等語查此事屢奉諭旨飭籌廢約力保路權三省

紳民爲大局起見志堅意決僉謂此路舍贖回自辦更無第二層辦法湘紳已呈明設立湖南鐵路籌款購地公司粵亦派定正紳來鄂會議開辦路工事宜並議定國民贖路股票辦法分投勸辦鄂士鄂民尤急盼觀成若仍令美國接辦比股必不能退比股卽是法股法與俄合是此路仍在俄法掌握之中危險不可思議非但英國必有責言卽三省紳民及中國在東西洋留學生亦必羣起譁噪竭力憤爭不成不休勢將橫生枝節別釀事端之洞固不能當此重咎且於國體大有妨礙仰懇聖明鑒察此路所爭者乃三省鐵路之主權非爭三

省鐵路之商利敕下外務部將朝廷俯察三省輿情決定除此辦法別無通融之意照會駐京美使並由外務部電知駐美梁使照會美政府俾得堅持前說不致功敗垂成爲外交笑柄國家大局幸甚三省士民幸甚除俟美股東定再行奏明請旨畫押暨粵督請派張振勳出洋招股一事容商妥另奏外請代奏文

軍機處來電

并致岑制台  
九日辰刻到

光緒三十一年七月初

電旨岑春煊電奏悉據稱粵漢鐵路爭回自辦贖路約需銀七百餘萬兩廣東分認三百萬兩已託張督代借洋債應急惟洋債還款粵力斷無可籌擬請特

派太僕寺卿張振勳出洋集款廣招內外華商不令  
暗附洋股等語此路贖回自辦實於全局有益出洋  
招集華股能否不至暗中攙雜別無流弊著會同張  
之洞妥籌辦理欽此樞齊

致軍機處外務部

光緒三十一年八月初四日申刻發

頃接駐美梁使電稱合興股東批准草約現由英格瀾  
福士達公擬售讓合同全以草約爲底本聲明中國大  
皇帝諭旨批准及合興議定將草約辦法施行等語誠  
細核此稿款式均尙合例詞意亦無出入已與合興議  
定西九月六號卽中歷八月初八日會同簽字可否奏

明請旨照稿簽押乞鈞裁等語查此項草約前已由電  
奏陳詳核條款均尙妥協擬請旨准予畫押以期早日  
收回路權由三省自籌開辦實與大局有裨此約應洞  
與梁使兩人簽押洞卽託梁使一併代押合併聲明除  
俟正合同由梁使寄到再行繕錄奏陳外謹先電達請  
代奏質

致軍機處

光緒三十二年四月初四日子刻發

奉三月二十一日電旨著將江召棠在教堂因傷致死  
情節先行查明迅卽詳晰電奏欽此查此案前據江西  
撫臬照印出江令召棠受重傷後手書五紙洞三次委



員到贛明查暗訪又向江令家屬索得手書四紙筆跡相符語尤明顯江西前照出之各紙內緊要語云王安之逼令自割一刀復有兩人捉手用剪刀加截兩下等語新查出之手書各紙內緊要語云意是逼我自刎我怕痛不致死他有三人兩拉手腕一在頸上割有兩下又小字云痛二次方知割兩次欲我死無對證等語又云爲新昌案辯爭威逼立放犯事教民以致決裂被殺等語又云件作驗卽明白填傷單存案並要劉先生眼見相驗爲是等語此外大率皆言王安之威逼情形及代百姓向王安之乞恩並囑派人保護教堂催件作速

趁該令未死相驗各等語竊思中國醫件所供皆云被殺而非自刎法人斷不憑信姑置不論據江西咨送美國醫賈爾思證書云整齊的橫傷在咽喉靠喉結之上又一傷傷口參差不齊將喉結前面從中一直分開美醫證書又云整齊的橫傷是用利器割的其餘之傷非用利器美醫證書又云第一傷用力氣輕些第二傷刺用力氣重些等語此爲以刀自刎以後又受他人以剪截傷之確據蓋翦利於刺不利於割故傷口參差不齊自割故力輕人截故力重也又據江西咨送法兵船醫福庚貝畫押憑單云傷口係在喉核之上開作扁形均

橫寬三寸係用利器所割法官醫憑單又云有一第二  
傷口係直式與第一傷口作縱橫式亦係用利器所刺  
此口亦可容指等語此爲刀傷之後又受煎傷之確據  
也法官醫憑單又云至於兩傷是否同時似雖非同時  
亦相距不多時耳等語此爲直傷亦係在教堂所受之  
確證也法官醫憑單又云此傷能致死乎曰可內面腫  
潰流血過多欲不死其可得乎等語此江令死由教堂  
受傷之確據也查江令自書者中國醫仵所言者法使  
固未必肯信豈美國賈醫所云甚至法國兵船官醫所  
言亦不足信乎總之兩洋醫皆謂係兩種傷一橫傷一

直傷美醫則云直傷重既係橫直兩傷後傷又重是江  
令實死於加功不僅由於自割實無疑義再法官醫憑  
單又云似此情形可斷爲自刎乎不能也又云頗似本  
人自刎之勢則又不能斷爲被殺也明係該官醫既不  
肯坐法國教堂之罪又不肯自受醫學不精驗傷不實  
之名故爲此騎牆之語然而實蹟難混公理難誣故法  
官醫亦只能作爲兩歧之語存疑之案法醫之語意蓋  
謂自刎被殺兼而有之明矣法官醫尙不能徑斷爲自  
刎中國何據而反斷爲自刎乎至英國醫生達歲所驗  
傷單在贛時堅索不肯呈出洞未見其全文但聞英醫

告江西各官云傷係一橫一直而不肯言自戕人戕與美醫法醫之言似亦無大歧異卽云先有自刎一傷然江令書已屢云由王安之威逼總之傷憑醫定案憑證定洋醫旣斷爲橫直兩種傷後傷較重然則後傷係何人所爲前傷因何事起衅自應一一研究方成信讞惟江令王安之均已死當時江令家丁茶房欲入內室均被教堂人力阻無人在旁目擊其教堂內要證劉宗堯艾老三胡宗賜三名前雖由法參贊白帶到贛一訊並未傳集多人質訊供詞一味推諉支離法主教動以兵船恫喝不肯交出覆訊然則加功究係何人自刎係如

何相逼抑或並無人加功無人相逼兩造均無質訊之人不能不憑兩洋醫傷單江令手書以爲證據大約江西省城教民則皆曰自刎平民則皆曰被殺然詢訪在江西之英美各教士多有歸咎於王安之者足見公道在人法人欲保該國教堂名譽故以全力爭此一節事關交涉固難澈究然而國體所關民心所繫彼縱不認加功我亦決不能斷爲自刎卽至萬不得已之時存疑猶勝武斷至於威逼情節亦斷斷不能抹煞或謂江令傷本不可死因焚殺教堂後有人逼之自死尤屬莠民誣罔之言洞委多員徧訪實無此事查江令才具素優

官聲最好其新昌教案保全一縣民命弭禍定亂其功不小此次被害亦由於爲民力爭雖重傷慘痛之際各紙手書皆諄諄以救民保民爲念故江令死後江西士民同聲悲痛憤不可遏新昌上高兩縣百姓來省痛哭弔祭者絡繹不絕何止數萬人在法人恃強偏執外務部辦理自不免棘手惟洞奉旨確查詳奏不敢不據實上聞至於此案應如何議辦之處伏候朝廷裁度救下外務部妥籌辦理總之江西教案無論與法人如何議結總不能歸咎江令雖不能責抵償於外人尙可存公論於中國俾日後可爲江令奏請優給卹典以勵愛民

捐軀之良吏庶足以存國體而服民心且免教慾日張  
日後更難保護洞區區愚慮不敢不言仰祈聖明鑒察  
密電上陳請代奏支

致軍機處

光緒三十二年五月十九日丑刻發

粵漢鐵路收回後三省亟應籌定辦法集款興工以免  
虛曠歲月徒耗贖路款本息及小票月息此時廣東路  
已定議歸商辦湖北路最短已定議歸官督商辦湖南  
情形係官率紳辦湘路最長需款最鉅諸紳集議年餘  
尙無切實辦法良由議紳衆多意見紛歧必須有人總  
理方免推諉延誤查有新授順天府尹袁樹勛才具恢



閱識力堅定能聲素著衆論交爭又查有前國子監祭酒王先謙品學兼優資望老成主持正論不詢流俗前年初創收回粵漢路之議湘紳公舉侍郎龍湛霖及王先謙爲總理經洞與前湘撫照會該祭酒在案龍尋卽病故卽王獨任路事於爭索路權一切深得贊助之力又查有前江西臬司余肇康心精力果綜核詳明勇於任事不避嫌怨湘省衆紳公議擬舉袁樹勛王先謙余肇康均爲總理俾得倡率鄉黨各效其長籌款興工早著成績並擬請旨飭袁樹勛迅速回湘查勘路綫險易酌議籌款辦法布置略有端倪再行到任實於湘省路

事大有裨益此時回湘固可籌辦卽他日入都亦可遙  
領毫無窒礙其以次任事各員容再博采衆議遴選分  
派請代奏效

致軍機處

光緒三十二年十月二十四日午刻發

昨接萍鑛道員林志熙上海盛大臣來電稱江西萍鄉  
有會匪四起搶劫占踞上栗市聲勢浩大湖南之瀏陽  
亦拏獲會匪多名醴陵亦報起匪二股該匪等並有革  
命軍先鋒字樣懇請派兵越境會剿查該匪悖逆顯著  
夥黨繁滋到處響應萍鑛及路已值銀數百萬若成燎  
原爲患更大不止鑛路而已湘撫來電已派兵往剿茲

由鄂派第八鎮十五協協統參將王得勝二十九標標  
統李襄鄰等率帶步隊全標三營礮隊二隊已於本日  
啟行惟湘水甚涸大輪難進現設法廣覓小輪拖至靖  
港舟行至洙洲乘鑛局鐵路車運到萍鄉會合湘贛各  
軍相機分赴萍醴一帶實力勦辦務期及時撲滅免致  
蔓延請代奏敬

致軍機處

光緒二十二年十月二十九日子刻發

兩次電旨恭悉疊接湘撫及萍醴來電匪勢尙熾已續  
派三十二標統帶白壽銘率領所部全標三營礮隊  
一隊馳往瀏陽會勦本日已啟行惟大輪並不能抵岳

州內河行甚艱滯又因湘軍多派赴瀏醴岳州空虛另派營官戴壽山帶一營四隊馳赴岳州填紮本日已到防矣請代奏豔

致軍機處

光緒三十二年十一月十三日辰刻發

據萍鑛道員林志熙及鄂軍協統王得勝電疊接湘撫陽庚兩電匪目曾廣鏗供安源總頭目係蕭克昌匪衆約六千人均與會內通氣約定會合接應瀏股往江西一帶長驅直入密請防拏查蕭克昌係北洋大臣來函所指之內部頭目等語旋經該協統王得勝標統李襄鄰督軍會同贛省防營胡應龍於初十日拏獲正法該

匪黨羽蠢然欲動堅留鄂軍仍駐安源保厥等語頃奉  
十二日電旨飭拏蕭克昌謹以上聞再前數日湘撫電  
匪勢注重長沙又岳州鎮府縣電稟平江之匪將趨岳  
州出長江請兵甚急因又趕派標統吳元澤率楊續緒  
一營星夜赴岳填紮防剿早已到防此時湘匪已無大  
股惟有合力搜剿躡拏匪目以防復熾請代奏元

致軍機處

光緒三十三年三月初四日辰刻發

湖北去年水災收歉糧貴鄰省湖南江西久已閉籬四  
川止允運出五萬石武漢商民百餘萬不勝憂懼外縣  
均漸有惶急之象茲特飭關局各員勸諭日本商人及

香港華商采運南洋西貢暹羅等處米三十萬石來鄂  
平糴入口及沿江應請免徵稅釐相應電奏請旨飭下  
沿海沿江各省關均免稅釐鄂民幸甚且洋米連檣入  
口不獨於鄂省有益於沿海沿江各省均有益洞爲安  
定長江各省人心起見仰懇聖恩速賜施行請代奏覺

致軍機處陸軍部

光緒三十三年五月二十七日  
戊刻發

本日巳刻接安徽司道聯銜宥電稱恩撫念六早赴巡  
警學堂大考會辦徐錫麟持槍亂擊恩撫身受數傷勢  
甚沈重餘人亦有受傷徐錫麟帶學生圍軍械所合城  
驚惶請派得力兵隊帶槍械子彈附輪速來等語查此

事非常之變實堪駭異皖省驚擾可知匪黨必當不少  
難保伏莽不乘機四起爲亂當卽派令第八鎮統制張  
彪湖北候補道李孺率新軍兩營礮隊一隊並兵輪兩  
艘卽日星夜馳往皖省會商該省文武相機拏辦彈壓  
謹由電馳陳請代奏感

軍機處來電

并致沿江沿海各督撫  
年五月二十九日子刻到

光緒三十三年

電旨安徽匪黨滋事巡撫被戕殊堪駭異沿江各省  
匪徒素多亟應嚴密防範著各該督撫妥爲布置勿  
任勾結以弭隱患而定人心欽此樞廿八日

致軍機處

光緒三十三年六月二十九日亥刻發

近接外務部函電以日法協約有礙中國主權令籌抵制之策及整理內政之方外患日亟曷勝憂憤除專屬交涉各事已徑覆外務部外查整理內政乃抵制之實際欲固邊防先定內亂方今革命黨各處橫行人心惶擾前奉明詔令內外臣工條陳時政竊思要政多端豈能數日間全行舉辦必須探源扼要方能靖人心而伐逆謀惟有仰懇聖明特頒諭旨布告天下化除滿漢畛域令內外各衙門詳議切實辦法迅速奏請核定施行此旨一頒人心自定亂黨莠民無可藉口所有立憲議會等事俱以此爲基址自然推行無滯其他各要政儘



可詳審斟酌次第舉行切懇朝廷處以鎮靜固不宜爲因循舊習所誤尤望勿爲浮言張皇所搖宗社幸甚天下幸甚不勝惶悚迫切之至請代奏

外務部來電

光緒三十三年六月二十日到

軍機處鈔交御史史履晉奏日法協約事機危迫請飭議抵拒之策一摺奉旨外務部知道欽此查日法協約文前據日本阿部代使送部大略謂日法兩府尊重中國獨立自主及其土地之保全在日法兩國得有主權保護權占有權之疆域相接中國各地確保秩序平和互相協助以保兩國在亞洲大陸地

位及領土之權等語法巴使亦來部面述本部以此  
事關係重大亟圖補救擬告日法兩國以中國地面  
中國自有保護和平維持秩序之責所有接近日法  
兩國領地之中國各地方自應由中國自行確保秩  
序及和平云因電劉使查取法文未到照會未發茲  
史御史奏請自應公同籌議務希執事深思至計及  
早圖維必在能以實事見之施行庶免彼將來干  
涉特先電商餘函達外務部二十日

致軍機處

光緒三十三年八月初四日在駐馬店發

洞因趕辦交卸緊要諸政病體未能調治眩暈怔忡氣

喘舌乾諸症均未見愈因奉命日久不敢再延力疾於  
初二日晚間起程初三日乘火車北上頃抵河南確山  
縣屬之駐馬店扶病趕程支持甚覺艱苦恐奏報之摺  
到京較遲謹先由電馳陳請代奏

張文襄公全集卷八十五終

紹興孫家棟校